

PARS SECUNDA

DE VARIO ET MULTIPLICI VSV HVIVS HOROSCOPII, qui quidem ex Solis Lunæq; motu & Stellis

quibusdam fixis pendeat.

PROBLEMA PRIMVM

Qua ratione uerum Solis locum in Zodiaco quocumq; die ex theorica Solis propria artificiose inuenias?

QVandoquidem in hac secunda parte cōfici nihil potest nisi inuento prius gradu Solis, Consultum visum est hoc quoq; sequens adponere instrumentum theoricæ solis, in quo facillime gradum Solis inuenies, si tamen filum subtile ipso centro adfixeris, Tunc itaq; diem Mensis supputa in quem Solis gradum scire cupis in circulo dierum Mensium, & huic quidem impone filum ex centro theoricæ, quod statim tam signum quam certum signi gradum tibi conmonstrabit, in quo Sol eo die permeat. In anno tamen Bisextili post finem Februarii vsq; ad exitum anni semper ad diem oblatum dies insuper vnus addendus est. Hinc itaq; iam supputatione confecta in limbo Mensium filum verum Solis locum in Ecliptica propositæ dici ostendit.

